



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

**Theatrum Asceticum, Sive Meditationes Sacræ**

**Neumayr, Franz**

**Ingolstadii [u.a.], 1747**

**VD18 14516888**

Meditatio III. Summè triste, sive Saul.

[urn:nbn:de:hbz:466:1-54686](#)

# MEDITATIO III.

## PECCATUM MALUM SUMME TRISTE SIVE SAUL.

### ARGUMENTUM.

**S**AUL ex Agasone Rex, Electus à DEO Amplissimæ Regionis Dominus, insuper victoriis glriosus, ita se Venerabilem suis, hostibusque formidabilem fecerat, ut ad summam felicitatem nihil ei defuisse videatur, præter constantiam, quam rursus peccatum evertit, *malum*, uti summe turpe, ac *noxiū*, ita, ne aliquod mali genus putas non includi, longè *tristissimum*. Certè à die illa, qua Saul per præsteram Clementiam, & prædæ cupiditatem contra DEL præceptum peccaverat, quod I. Reg. 15. narratur, nulla homini hora fluxit, qua sincerè gauderet. Nam desertus à DEO *relictus est sibi*, & indomitis affectionibus animi, quæ misericordis oppressum cor diu, noctuque torquebant. Ante alias terror invasit, cùm diceret Samuel: *Pro eo, quod abjecisti sermonem Domini, projecit te Dominus, ne sis Rex!* Deinde succedit *invidia* adversus Davidem, tanquam corrivalem Regni accensa. Invidiam fecutum est atrox odium, quo in cædem innocentis exardescet: perpetua *anxietas*, ne quā æmulus tam metuendus elaberetur: *infana*



insana rabies, qua in Sacerdotes, qui fugitivum commeatu adjuverant, per manum Doeg Idumæi desævxit. Demum cùm nihil succederet ex sententia, immanis mæror pectus totum exédit, ex mœrore nata infelix obstinatio adegit, ut de rebus agendis Sagam consuleret: ibi Samuelis apparitio, & extremæ calamitatis denuntiatio crudeli horrore mentem ita concussit, ut impos sui, jam neque pugnare, ut olim, in hostem posset, neque vivere post cladem exercitūs ultrà vellet. Itaque factus ipse carnifex sui, postquam diu se torserat, occidit se, &, utinam, cùm vivere desiit, desisset torqueri!.. Nos, ut ex aliena miseria sape re discamus, attentiùs, quod narratum est, expendamus. Sit igitur præsentis Meditationis

*Materia: Tristissima vita, & multò tristior Sau lis Mors.*

*Puncta duo. Primum, Saul à DEO desertus.*

Secundum, Saul sibi permisus.

*Fructus: Detestatio impii axiomatis: Peccavi: & quid accidit mihi triste?*

*Propositum: Fuga peccati, etiam cùm ad peccandum aut libido voluptatis invitat, aut metus doloris impellit. In specie decernamus practicè experiri, quām vera sit illa S. Chrysostomi sententia: nemo læditur, nisi à se ipso, nempe quia omnis inquietus animi à passione non domita originem habet, & turbari vī nulla externa potest, qui imperare sibi, & suis affectionibus didicit.*

*In Choro Ostenditur, quod difficilior sit via ad infernum, quām quæ in cœlum ducit.*

Uu PER.

*Peccatum  
PERSONÆ.*

*Saul Rex.*

*Jonathas Saulis Filius.*

*Samuel Propheta.*

*Doëg Idumæus,*

*Abiathar Filius Abimelech, quem Saul cum 84. aliis  
Sacerdotibus Doëgi manu occiderat.*

*Misaël Saulis Armiger,*

## PROLOGUS.

*Reflexio in Mediationem præteritam, &  
Præparatio ad præsentem.*

*Fides. Ratio.*

*Ratio.* **H**em verò, quó me abripis hodie \*  
Cur in æstuantis pelagi constituis littore?

*Fides.* Didicisti peccati *damna metuere,*  
*Docui peccati dedecus erubescere:*  
*Timori, & Pudori ut adjungat se Horror,*  
*Efficiam hodie.*

*Peccatum esse malum, ut turpe, ac noxium,  
Ita multò tristissimum,*  
*Vides in hac imagine.*

*Ratio.* Difficile exhibes Symbolum,  
Cui ego contrarium habeo  
Experienciæ testimonium,  
Quod firmat gemitus  
Iustorum passim querulantium:

\* Exhibetur mare fervens.

Quare



*Quare via impiorum prosperatur? Jerem. 12.  
Quare flagitia videmus esse felicia?*

*Aria*

I.

Stat impiis mare pacatum,  
Arridet, invitat pescatum:  
Non videoas fluctum,  
Qui moveat luctum:  
Non asperi Boreæ flant,  
Sed facilem cursum Favonii dant.

2.

Vehuntur in navi aurata  
Ad luxum, & pompam ornata:  
Sirenulæ plenîs  
Applaudent camœnîs:  
Ad clavum Felicitas stat:

In circulum ludens Hilarites nat.

*Fides.* Sic nempe intueris, quod exhibent oculi,  
Et ultrò gaudes decipi.  
Ergóne tu felicitatem hominis  
In bonis externis constituis?  
Atqui nihil juvat domus splendida,  
Si æger, & afflictus est incola....  
Foris cytharæ sonant, & organa,  
Intus strepunt tubæ ac tympana!  
Non enim (hoc dicit Dominus)  
Non est pax Impiis! Is. 48.  
Sed bella perpetua, & lites ex concupiscentiis, Jac. 4.  
Quæ præliantur inter se,  
Quasi mare fervens, quod non potest quiescere. Is. 57.  
Aipice! ... \*

Uu 2

*Aria.*

\* Tumultus maris.



*Peccatum**Aria.*

I.

Hic, hic est æstus mentis  
Peccato subjacentis! ...

Sic fremit! ... sic turbatur! ...  
Sic spumat! ... sic inflatur! ...  
Sic jam astra conspuit! ..  
Jam in stygem præceps it!...  
Sic jam in montes crescit!...  
Jam crepat, & tabescit!...

2.

Quod Pelago sunt venti,  
Hoc sunt affectus menti,  
Qui quando dominantur,  
Spes, quies, pax fugantur:  
Succedunt curæ, dubia,  
Timores, furor, tædia! ..  
Has habes perpetrati  
Delicias peccati.

*In Saulo* ista ostendet se veritas:  
Accingere, ut intelligas.

*Ratio.* Ecce me! loquere, quia audio te.

*Aria.*

Loquere! audio!  
Solidō gaudiō  
Reficis me,  
Si, quām sint tristia  
Impii gaudia  
Discam à te! Fides. Disces à me.

Quò



Quòd, (quisquis Reus sit,)  
Magnum qui DEum scit  
Læsum à se:  
Nunquam, si sapiat,  
Serò rideat,  
Doceo te. Ratio. Audio te.

## MEDITATIONIS III

### De tristi vita, & morte Saulis

#### PUNCTUM I.

*Saul à DEO desertus.*

#### SCENA I.

*Samuel. Saul.*

*Saul.* Vir senex, aīs mulier, \* Vir senex ascendit, amictus palio! (1. Reg. 28.) bene habet: Samuel est! cur fugis tu? .. O assurge, assurge Propheta sancte, & miserum Regem juva! *Sam.* \*\* Propheta sancte! nunc color! nunc adoras! Infelix! qui non audisti bene monentem vivum, quare nunc inquietasti me, ut suscitarer mortuus? *Saul.* Eheu! coarctor nimis! *Sam.* Quid afflit? *Saul.* Philistium pugnant adversum me! *Sam.* Hostes toties à te victos hodie metuis? *Saul.* Metuo, quia DEus recessit à me! *Sam.* Ora, ut redeat. *Saul.* Oravi, sed prò dolor! exaudire me noluit, neque in manu Prophetarum, neque per somnia: vocavi ergò te, ut ostenderes mihi, quid faciam.

Uu 3

*Sam.*

\* Ad mulierem infra theatrum.

\*\* Samuel alcendit ex inferis.

*Sam.* Nempe hoc deerat complementum sceleribus, ut remedium ab inferis quæreres, & ab ultimo scelere sperares solatium. Sed absit! Spes impiorum peribit! quid interrogas me, cùm Dominus recesserit à te, & transferit ad Æmulum tuum. *Saul.* Vah! quid audio? ergò irritus omnis labor est meus! David Rex erit nomen invisum, David? *Sam.* Ita fiet: nam faciet tibi Dominus, sicut locutus est in manu mea, & scindet Regnum tuum de manu tua, & dabit illud proximo tuo David. *Saul.* O durus sermo! Quia non obedisti voci Domini, neque fecisti iram furoris ejus in Amalec, idcirco quod pateris, fecit tibi Dominus hodie. *Saul.* Tantumne peccatum fuit misereri Regis miseri, & victo parcere? *Sam.* Scelestam misericordia fuit, quam DEus prohibuit. Nónne cùm parvulus essem in oculis tuis, caput in tribubus Israël factus es, unxitque te Dominus in Regem super Israël, & misit te Dominus in viam, & ait: vade, & interfice peccatores Amalec, & pugnabis contra eos usque ad intermissionem eorum: quare ergò non audisti vocem Domini? (I. Reg. 15.) *Saul.* Imò audivi vocem Domini, interfeci omnes Amalecitas, soli Regi pepercī, trementi, ac deprecanti. *Sam.* Ideò Dominus tibi non parcet. *Saul.* Et coegit me populus, ut servarem de præda primicias, quas immolaret Domino in Galgalis. *Sam.* Frustra te defendis: nunquid enim vult Dominus holocausta & victimas, & non potius, ut obediatur voci Domini? quasi peccatum Ariolandie est, repugnare: & quasi scelus idolatriæ, non acquiescere Mandato DEI. *Saul.* Habe igitur fatentem reum: peccavi, quia prævaricatus sum sermonem Domini, & verba tua, timens populum & obediens voci eorum! *Sam.* Timens populum, & non timens DEum? *Saul.* Peccavi! *Sam.* Obediens populo, non obediens DEO? *Saul.* Peccavi! *Sam.* Irriti sunt gemitus, sera suspiria: Iam enim scidit Dominus Regnum Israël à te hodie, & tradidit illud proximo tuo meliori te. *Saul.* Heu! triste, atrox, execrandum peccatum! *Sam.* clama, ut vis. Porro triumphator in Israël non parcet, & pænitudine non flectetur: neque enim homo est, ut agat pænitentiam

(ibi-



(ibidem) Et dabit Dominus etiam Israël tecum in manu Philistium: cras autem tu, & filii tui mecum eritis! (1. Reg. 28.) Saul. Ergò actum de Saule est! projicit Regem DEus, quem ipse per te elegit? Sam. Projecit ingratum, contumacem, invidum, sacrilegum, & hodie rebellem transfugam à coelo ad inferos! project! Saul. Ah! peccavi iterum peccavi! sed dira calamitas suggestit detestandum consilium. Sam. Stultum consilium est malum majus eligere, ut minus evadas, culpam decernere, ut pœnam evites, hoc est, ut effugias unam pœnam, reum te facere novæ pœnæ. Saul. Peccavi! Sam. Ergò meruisti poenam? Saul. Merui. Sam. Ergò animum compara, ut cum fructu sustineas. Saul. Deprecare DEum, obsecro, ut parcat mihi! Sam. Non parcer: corona, vita, filii perierunt: cras mecum eritis! \* Saul. Heu! deseris me! Sam. Vide, ne tu te deseras! ultima gratia est, quod me DEus fuscitaverit tibi: utere pro bono animæ! de corpore actum est! Saul. Actum est! moriar! Sam. Cras. Saul. Horrendum oraculum! Sam. Pœna peccati! Saul. Deprecare! Sam. Sustine! Saul. Deseris? Sam. Desertum à DEO! .. Saul. Me miserum! .. \*\*

## SCENA II.

*Doeg. Armiger Saulis.*

Arm. Quid video? cadis Rex! Rex, vive, obsecro, & à terrore te collige! .. prô, ut friget! vix venam icat! vix tenuem anhelitum sentio. Quid faciam? .. Doeg! Doeg surge! \*\*\* Doeg. Quid vis? jam confectum cum Pythonissa negotium est? Arm. Surge modò, & Regem juva: deinde loquar. Doeg. Regem juva! unde periculum venit in hac solitudine, in media

\* Iterum descendit Samuel.

\*\* Saul animo deficit.

\*\*\* Ad dormientem.

media nocte? *Arm.* Vides, ut vix animam trahat? *Doeg.* Quid factum est? *Arm.* In Deliquum concidit, ex terrificae visionis horrore porrectus in terram (*ibid.*) quid consulis? *Doeg.* Redibit ad se: nihil metue gravius. Curre modò, & mone mulierem, ut coquat Azyma, quibus reverso spiritu vires reficiat Rex, ut possimus redire in castra. *Arm.* Propero. *Doeg.* Spirat, Rex!.. non audit! non sentit!.. hochabet, qui credit Sagis... Hinc ego mihi metuo nihil, quia non credo dari sagam, quæ cum orco commercium habeat. Quomodo enim existere potest mulier amica inferis, cùm nulli dentur inferi? nihil horum! præstigias vocant creduli homines occulta artificia fallacium foeminarum, quarum inania terriculamenta viri cordati rident. Quid dicit mulier redit? *Arm.* Ipsa terrore propè exanimis intus sedet: colligit se tamen, & parabit aliquid esculenti. Rex autem quid? *Doeg.* Nondum se movit. Gravissimus terror fuerit, qui spiritus animales tam diu opprimit, & sensus sopitos tenet. *Arm.* Gravissimus utique, nam & ego adhuc totis artubus tremo, dum cogito, quæ audivi, & vidi. *Doeg.* Tu vidisti aliquid? *Arm.* Cùm abstraxit à nobis Regem mulier, & tu te composuisti ad somnum, me curiositas impulit, ut vestigia tacitus legerem, atque observarem, quid fieret. *Doeg.* Nempe circulum formavit saga, & in centro jussit Saulem consistere. Scio, quibus nugis istæ mulierculæ simplices animas dementent. *Arm.* Rem dixisti. *Doeg.* Turn utique cœpit immutare vultum, asperare frontem, torquere oculos, inflare genas, & peregrina verba furentis instar circumcursans declamare. *Arm.* Volebat: sed prævertit festinante Samuel, atque ultrò se stitit. *Doeg.* Quid? Samuel se stitit? *Arm.* Samuel, inquam, albâ talarî tunicâ, multa canitie, & magno splendore venerabilis. *Doeg.* Rideo. *Arm.* Quare? *Doeg.* Quia tu Phantasma tuum Samuelem appellas. *Arm.* Samuelem vidi. *Doeg.* Non credo. *Arm.* Quare non credis? *Doeg.* Quia Samuel sepultus est in Ramatha: quomodo ita subito

subitò huc se transtulisset? *Arm.* Corpus ibi sepultum est: spiritum ego vidi. *Doeg.* Stultitiam loqueris: nego, quod detur spiritus. *Arm.* Spiritum negas dari: qualem igitur habes animam tu? *Doeg.* Hæc est alia quæstio: nunc ego hoc nego tibi, quod videris Spiritum: illusio fuit. *Arm.* Bellè! quis igitur tribus simul illusit, mulieri, ut fugeret, Sauli, ut in deliquium concideret, mihi, ut adhuc tremam? *Doeg.* Phantasia illusit. *Arm.* Et quis phantasie trium, eodem tempore, in eodem objecto? omnes enim vidimus Samuelem? *Doeg.* Quia voluistis videre. *Arm.* Audivimus insuper! *Doeg.* Quia voluistis audire. Sile! nisi etiam video, non credo, quod dicis. *Arm.* Pecora sic loquantur, quibus solus oculorum, & nullus Rationis est usus. *Doeg.* Atqui Ratio docet, fieri non potuisse, ut Samuel apparuerit: unde enim tam efficax foeminæ in mortuos imperium sit? *Arm.* Non dixi jam, priusquam mulier incantationes incepit, adstitisse Prophetam? sed desine altercari: non fero diutius intempestivam garrulitatem. Visio certa est: testem Regem appello. Rex!.. vah! adhuc jacet sine motu, sine sensu!.. vim, Doëg, magnam inferre Rationi debemus, si persuadere velimus nobis, terrorem, qui tam diu congelat sanguinem, partum esse phantasie deceptæ. Si tamen aliquod in hac re prudens dubium esse potest, vercor, ne tollat eventus extremæ calamitatis, quæ in crastinum denuntiata est Israëli. *Doeg.* Crede, quod vis: idem ego facio. At en! quis inde ex fructis se movet huc media nocte? *Arm.* Miror.

## SCENA III.

*Jonathas. Armiger. Abiathar. Doeg.*

*Jon.* **A**MICE, insolitus horror animum concutit, & mihi tristè sic rubens luna magnum malum præfigit.\*

Xx

*Doeg.*

\* Ad lucem lunæ rubentis veniunt.

*Doeg.* Vox Jonatham loquitur. *Ab.* Avertat exitum DEus, &  
 servet te nobis, Princeps! *Arm.* Est ipse: non fallimur. *Jon.*  
 O servet mihi parentem DEus, & recipiat in gratiam, unde  
 excidit miser: libenter, libenter regnum, sanguinem, vitam  
 immolo. *Doeg.* Recondimur, dum videamus, quid velint.  
*Jon.* Adsumus! non dubito: hæc specus est Pythonissæ! hic  
 lates Pater mi! & fortè hæc ipsa hora est destinata infami  
 commercio cum damnatis spiritibus! heu! in quale bara-  
 thrum prolapsus est Parens?... *Ab.* retrahere gradum Jona-  
 tha! circulum video descriptum à saga! *Jon.* O scelus! vesti-  
 gia Patris impressa cerno! moventur viscera atroce metu!  
 prô! novum malum! ecce! in cadaver impegi! *Ab.* Funesta  
 nox, quò abduxisti nos? vah! si fortè incidimus in spelun-  
 cam latronum! fugiamus! *Arm.* Imò subsiste, Princeps, fe-  
 lix ades ad solatium Regis Patris. *Doeg.* Certé indiget,  
*Jon.* Amice! video Parentis hostes: non irruam, & percu-  
 tiam gladio? *Ab.* Perditi homines! quò abstractus est Rex  
 à vobis? *Doeg.* quò ipse voluit. *Jon.* At num vestrum erat  
 pestilenti consiliô virum jam pridem invisum DEO in ulti-  
 mum scelus impellere, quod maturaret interitum? *Arm.*  
 Ultrò jusserrat inquirere mulierem habentem Pythonem: di-  
 ximus, esse in Endor aliquam, mutavit habitum: ivit. *Jon.*  
 Fidelium servorum fuit, silere locum, & dissuadere flagitium,  
 quo non aliud esse detestabilius DEO Israel, utique sciebatis.  
*Doeg.* Quid ageremus? desperârat à coelo opem: decreverat  
 ab orco petere: decretum impediri non potuit. Laudare nos  
 debes, Princeps, quòd consilium adjuverimus: doctus per  
 experientiam, quàm vana sit de artibus magicis fides, & sic  
 coactus necessitate, cor vertet ad Deum nostrum. Sæpe  
 grave scelus bonæ pœnitentiæ, & magnæ felicitatis occasio  
 fuit. *Jon.* Scelus defendis impie! novil, qui sis, Doeg, sem-  
 per adversus Jonathæ, semper infensus Davidi meo, semper  
 Patris

Patris scelesta consilia malignè fovens, ut placeas nempe, non ut prosis. At ecce! dissimulo omnia, & veniam dono, si hodie saltem non obsistas conatibus, propter quos huc me attuli. *Doeg.* Princeps, ego adversum te nihil pecco, cùm patri obedio: Pater Rex est. Cæterū si tu suadeas aliquid, quod Pater probet, utrique servio. *Jon.* Atqui hoc agis semper, ut improbet Rex, quod Jonathas cupit: hodie sile saltem, si modò Regii Principis aliqua reverentia est. *Doeg.* Audiam, quid velis. *Jon.* Ubi est Parens? *Arm.* Jam vidisti: sub oculis jacet. *Ab.* Heu! Saul! *Jon.* Hoc cadaver! *Doeg.* Spirans tamen, & en redit ad se! audivi gemitum. *Arm.* Aperit oculos, & ex longo deliquio sibi redditur. Rex vive!

## S C E N A IV.

*Accedit Saul.*

*Saul.* Amici! *Jon.* Rex Pater! agnoscis filium? *Saul.* Heu! *Jonatha* fili mi! fili mi *Jonatha*! heu! heu! heu! *Jon.* Prô Superi! iterum exanimis recidit. *Ab.* Quod ei accidit malum? *Arm.* Terribilis visio sic prostravit. *Jon.* Sagæ scelesta illusio fuit! *Doeg.* Etiam dixi. *Jon.* Pater, collige vires! *Saul.* Recede fili, recede, quoniam DEUS reces- sit à me! *Jon.* Attollite humo: respirat enim. O DEus meo- rum Patrum, nunc saltem Patri mentem da meliorem! ah! ut sit, qui olim fuit! olim non erat vir melior illo (I. Reg. 9.) quantum mutatus est!... Pater mi, quis est animus tibi? *Saul.* Periimus, fili mi, periimus! *Jon.* Non periimus, nisi nos DEus deserat. *Saul.* Deseruit! O Samuel! Samuel! *Doeg.* Sa- muelem putat vidisse se ultima omnia minitantem. *Saul.* Quæ hora est noctis? *Ab.* Medium cœlum tenet. *Saul.* Er- gó jam instat summa dies, qua apud inferos ero! *Jon.* Pa- ter! si ita decretum est cælo, ut ais, nostrum est, curare,

ut apud Superos simus. *Saul.* O triste peccatum! quām tristem fecisti vitam, & quantō tristiorē jam mortem facis! triste peccatum! *Jon.* Audiam à te, Pater, quid timeas: nam ego spe bona firmus innitor D E O. *Saul.* Innitere, tamen cum Patre cades: coronam auferet tibi David tuus, quem utinam occidiſsem! tu impedisti. *Jon.* Rex! qui tibi coronam DEus dedit, si jam tollit, aufert, quod suum est: sino lubens. *Doeg.* Fatigas parentem, Princeps, patere, ut intrœat, comedat panem, bibat aquam, & à terrore se colligat. *Saul.* Non comedam. *Arm.* Imò huc ego cibum efforam. *Saul.* Non comedam. Dic potius, fili mi, quare tu huc ad me venisti? & quis me prodidit tibi? *Jon.* Audivi, quod de Pythonissa interrogaveris: an difficile fuit divinare, quod ieris? ivi, ut, si possem, impedirem enorme scelus, quod tu ipse sic odisti olim, ut sub regiminis initium ex universo regno omnes ariolos, magosque expuleris. *Saul.* Memini: sed nunc aliæ sunt circumstantiæ: clausum coelum, & ferro durius coegit ire ad inferos, ut opem ferant. *Jon.* opem speras ab inimicis? *Doeg.* Paulatim liberior meat spiritus! comede Rex, ut vires redeant: redeundum in castra erit, antequam dies oritur: via, curæ, pugna refocillationem exposcunt. *Saul.* Corpori vires sponte redeunt, animo reddite, quem horror, moeror, timor, & desperatio totum prosternunt. *Arm.* Rex, festinavit mulier, & paravit aliquid obſonii præter panem: orat, ut ingredi velis, & reficere te. *Doeg.* Animus implicitus corpori cum corpore vigorem recipiet. Sine, ut introducam. *Saul.* Obsequor, quia vultis: fili, sequere. *Jon.* Hic expecto: non enim ferre vultum sagæ patiens possem. At tu, Misael, dic mihi, veréne Samuel apparuit Regi? *Arm.* Verè, Princeps, his oculis vidi, his auribus audivi. *Jon.* Quid loquentem? *Arm.* Melius aeo. *Jon.* Lōqueris satis. Ingredere jam, & cùm observaveris,



veris, Regem pleniùs esse redditum sibi, labora, ut huic viro, quem ego amo, benevolam audientiam facias. *Arm.* Quis vir est? *Jon.* Dices, missum esse à Davide summi negotii causâ: cætera ego exequar. *Arm.* A Davide missum difficulter alloquetur. *Jon.* I, fac, quod dixi: postremum obsequium filio Regis facis. *Arm.* Superi avertant omne imminens malum.

## SCENA V.

*Jonathas. Abiathar.*

*Jonathas.* **A**Biathar, seri conatus sunt: peractum est scelus, consulta saga, vocatus orcus in subsidium, irritatum novo crimine bonum Numen, periimus! umbra Samuelis denuntiavit sententiam: hinc Patris deliquum fuit: intelligo omnia! periimus! Sic ego infelix filius sum, qui Patrem habeo, quem DEus odit! *Ab.* O digne Juvenis, quem sors melior amet! me miseret tui, maximè, quia non inventio, unde te juvem, aut consoler saltem: nam verba etiam singultiens dolor frangit!.... *Jon.* Siles, amice? fles? *Ab.* Ah! quare me misit David, ut viderem, & audirem talia, quæ vel saxeum cor mollirent in lacrymas. *Jon.* digna est lacrymis materia, offensus DEus, reprobus Pater, damnatus ad mortem Rex, imminens exitium familiæ regiæ! *Ab.* Parce DEus! parce innocentij Jonathæ saltem! *Jon.* Imò tolle Jonatham DEus! Patri parce! gaudens morior, si mors mea Parenti proficit. Sed cheu! Abiathar, graviora sunt Saulis scelera, quam ut placando Numini sufficiat hostia tam exilis: metuo, ne peccata sua luat æternū miser! & sic ego demum verè infelix filius sum, quippe ex patre natus æternū reprobo! *Ab.* O Nobilis anima, quam bene tu inter levem & gravem materiam boni luctus distinguis! *Jon.* Neque tamen vel in

XX 3

tam

tam gravi luctu omne solatium deest. Amice; corona Regis Israel ex capite, quod odit DEus, transferetur in caput cælo & mihi charum: Regnabis pro Jonatha dilecte David! hoc solatur: vive! regna! Ab. Discerpit pectus hæc exclamatio, & tanta virtus elinguem facit. De Davide cogitas Jonatha, nunc, sic? Jon. Hæc sola dulcis cogitatio est: vivet, cum ego moriar, vivet, regnabit David: vivat! regnet! vir est, qui amat DEum, quem amat DEus: igitur regnabit bene, secundum cor DEI regnabit: vivat! regnet! Ab. Hæc Fortitudo heroicæ mentis est. Macte animo, Princeps! decretis cæli submittis lubens caput, coronâ ex sideribus dignum: spera! coronaberis! Jon. Putas, sine fructu amicitiam cum Davide me coluisse? virtus hominis origo fuit beatæ familiaritatis, virtus amorem incendit, amor traxit ad imitandum. Suspexi in homine contemptum rerum humanarum: non illum Samuelis unctio, non spes coronæ de cælo promissæ, non victoriæ de gigante relatæ gloria, non aggratulationes & plausus populi, non regiæ nuptiæ extulerunt, ut aspernaretur minores sc, aut se crederet majorem esse, quam in oculis DEI videretur. Suspexi præterea innocentiam morum, & summam curam, qua cavebat sollicitè, ne admitteret aliquid, quod offenderet DEum. Suspexi Zelum insuper, quo ardebat adversum hostes populi DEI, in quorum interencionem ruebat impavidus in omne periculum, in medias mortes. Denique suspexi maximè invictam patientiam, qua Patris insanam invidiam, & indomabile odium pertulit, nunquam vindictæ appetens, sœpe bona pro malis reddens, semper erga Christum Domini reverens. Quam in docilis fuissem, Abiathar, si ex his exemplis nihil profecisset? Patri, amice, post DEum debeo, quod homo sim: si bonus homo sum, ut tu putas, Patri planè non debeo! Davdis tibi dilecti exemplô, DEUS, de profundis clamo ad te: Exurge Domine,

*Domine, salvum me fac! quòd si nolis, nón tie tibi subiecta erit anima mea? Ecce! in flagella paratus sum! accinge te: feri! perime! Ab. Ah Superi! utinam infelix Saul hausisset aliquid ex ista indole!*

## S C E N A VI.

*Doeg. Jonathas. Abiathar.*

*Doeg. Princeps, ut videoas, quòd Doeg tibi non sit adversus, cave, ne iste comes tuus subeat iterum aspectum Regis. Jam plenè redditus sibi Rex, ut audivit ab Armigero, hominem ex castris Davidis esse, præcepit furens, irruere me, & intrò abscissum caput in mensam ferre. Ego revereor te, ô Princeps, propterea moneo, ut hominem à te dimittas: sic aufugisse dicam, & evadet. Jon. Quid audio? Ab. Quid merui? Doeg. Transfugam odit Rex, quòd violata fide Domino, adhæreas rebelli servo. Jon. Quem sic appellas infande latro! modestius tu mihi loquere, cùm de Davide loqueris: Jonathas sum. Ab. Neque rebellat servus, qui fugit iram in justam Domini. Jon. Scis, qui sit, in quem immitteris? Ab. Fortunà aberam, quando ausus es, scelerate proditor, quinque supra octoginta sacrilegò ferrò Sacerdotes invadere accinētos Ephod linea, (1. Reg. 22.) inter quos Princeps Achimelech fuit, Pater meus, nam ego, ne ignores, Abiathar sum. Si meum etiam sitit sanguinem Rex, propina Idumæe, habes. Jon. Cave, ne manum videam admotam capulo: nam prior cades. Doeg. Sic excipior obediens Regi? Jon. Quem in furorem agis. Mœrore obrutus Parens quid agat, nescit: fidelis servi est, moderari impetum, non adjuvare. Ab. Aut num male tibi visi sunt agere conservi tui nuper, cùm nullus ex Israelitis ausus est extendere manus suas in Sacerdotes Domini, quanquam juberet Rex? unus inventus est ita fidelis Doeg Idumæus,*

mæus, ut mallet DEum, quām Regem offendere! Doeg.  
Abiathar, in gratiam Jonathæ volebam parcere: nunc, quo-  
niā non æstimatis beneficium, admoneo Patrem de auda-  
cia Filii.

## S C E N A VII.

Saul. Jonathas. Doeg. Abiathar. Armiger.

Jonathas. *A*Mice, in latebras abde te, & primi furoris impe-  
tum fuge, ego sustinebo securius: nam quan-  
tumvis tyrannus sit Pater, adhuc tamen filium amat. *Ab.*  
Amat, quem jam bis occidisset, nisi vetuissent amici? *Jon.*  
Cessa obniti contrà: absconde te. *Ab.* Quoniam jubes. *Jon.*  
Adest summa dies! ama me coelum, ut Patrem conciliem  
tibi, priusquam moriamur! *Saul.* Quis imperat? Jonatha;  
tanti est Pater tibi? trade transfugam! quò auffugit? *Jon.* Non  
sum proditor innocentis. Obsecro, Rex, num utramque  
aurem semper uni Idumæo indulges, nec unam saltem ser-  
vasti filio? iste meus Comes Abiathar est, Sacerdos Domini:  
quo titulo meretur mortem? *Saul.* Adhæret rebelli: non est  
reus satis? *Jon.* Mihi innocens David est, non rebellis. Pa-  
ter, argumentum fidei ex hoc ipso Legato cape. Philistæi  
cùm contra nos se congregârunt, dimiserunt à se Davidem me-  
tuentes, ne in æstu prælii arma in ipsos verteret: adeò vel hosti-  
bus persuasum est, quòd vir illibati candoris non oderit Saulem, sed  
fugerit. Deinde nunc, cùm te absente passim diffluxit exercitus,  
optimi qui que ad Davidem transfugerunt. Et quid ille? mittit ad  
me Sacerdotem, rogat, ut recipiat in gratiam, spondet, cum  
omnibus suis accessûrum se nobis, & contra Philistjim pugnatu-  
rum: per Deum obsecro, si iste animus videtur hostilis tibi, quem  
tandem amicum putas? *Doeg.* Sæpe bona verba malam fidem ob-  
tegunt: & tu male defendis fugitivum, Princeps: nam qui suspectus  
est

est hostibus, unde à nobis meretur recipi? *Jon.* O malè feriatum caput, quo usque obsistet mihi? scilicet tu ignoras Davidis merita? ah! merita si nulla essent, esset amicus felix: virtus, animus, gloria fecerunt invisum æmulis. *Ab.* Et innocentis odium te facit, Rex, invisum DEO! *Jon.* Vah! qua te fiducia prodis Abiathar? *Ab.* Fiduciā causæ. Ecce Davidis nomine nunquam violatam iterum; juro fidem, & DEum testem invoco mentis bonæ! *Saul.* Doëg, patrem in filio cerno. Achimelech iste est à te occisus, jubente me! intremuit pectus malè conscienti sibi! surge, abi, torqueor! *Doëg.* Reliquæ panic terro ris agitant: omitte istos, Rex, in prælium imus. *Jon.* At nunc Pater, impium Idumæum ne audias: Samuel vera dixit: Sanguis Achimelech vindictam clamat: in mortem imus, si in prælium imus, priusquam te cum DEO, & Davide concilias. *Saul.* Quòd tibi vitam istius transfugæ donem, sit tibi nunc sati s, fili: de pace tractandi tempus jam non est ampliùs. Arma Misaël, gladium, scutum, lanceam! *Arm.* Inutilis apparatus est, cùm DEus est hostis. *Saul.* Etiam tu trepidas? *Arm.* Utique, postquam Samuelis umbram audivi, & vidi. *Doeg.* Sic est!: umbram iste timet, futile artificium fallacis foeminæ. Tu verò, Rex, contemne has officias, emasculantes animum invictum hactenus, & ad omnes casus intrepidum. Jam declinat nox: aurora cùm pinget coelum, hostis invadet castra: si vel absens se occultet Rex, vel præsens tremat: honor, victoria, exercitus periit. Reddet et tuis, priusquam diescat, ostenta vultum hilarem, dic: Samuelem stitisse se tibi insignis victoriæ vatem: sic utili mendacio animatus miles fortiter in hostem ibit. Hoc consilium, Rex, hoc, & nullum aliud admittit tempus, cætera permitte fatis. *Saul.* Dura fata! *Jon.* Desperatum consilium! *Ab.* Scelestus sermo! *Arm.* Funestum remedium tot malorum! *Doeg.* Sed necessarium, & fortè felix. *Jon.* Post triste oraculum! *Doeg.* Nihil credo. *Ab.* Non ideò falsum

Y y

falsum

falsum est. *Saul.* Falsum an verum sit, est perinde. Doēg imus! si vinco, felix sum: si cado, habeo vitæ infaustæ finem. *Ab.* Animam cum vita prodigis: animam commenda DEO! *Saul.* Qui me deseruit! *Doeg.* Effæminat hæc cura militem: nemo pugnat animosiùs, quæm qui persuasit sibi, quòd post mortem supersit nihil.

## S C E N A VIII.

*Jonathas. Abiathar.*

*Abiathar.* *A*lludis, Princeps, quod axioma jaetet impius Idumæus? *Jon.* O Pater infelix! verè te DEus deseruit: nunc intelligo, postquam te tibi reliquit, & impiis consiliis infamis advenæ!.. Amice, à quo tempore Saul in DEum peccavit, crede mihi, non fuit momentum, quo serio lætum vidi. Terror, ira, odium, rabies, mæror, obstinatio, horror sic discerpebant cor, ut ego sæpe hominem miserans tacite ingemiscerem, & dicerem mihi: quæm triste sit peccare, vide in Patre, Jonatha, vide, & horre! ô Pater! miserrime Pater!.. At seri sunt gemitus! *Justus es Domine, & rectum judicium tuum!* damnasti ad mortem cum Patre filios, laudo sententiam, quia tu fecisti, qui omnia sancte facis! Amice vale! ultimum amplexum pro meo Davide cape: dic, lætum Jonatham in mortem isse, eò quòd relinquere post se in vivis dimidium sui. *Ab.* Ah! totum te amico serva, fuge prælium, ad Davidem imus! *Jon.* Absit! nam ut ego moriturum Patrem deseram; etiam David nolit. Ad latus pugnabo illi, ut, si prior cadam, exemplò prosim, si prior ille, verbô juvem ad mortem bonam. *Ab.* Nec metuis mori? *Jon.* Abiathar, amo DEum, & amat me DEus: sic spero firmiter, & securum conscientia facit: igitur intrepidus obvium pectus morti fero, quæ mihi vitæ melioris principium sit in sinu Abrahæ. *Ab.* Perge fortis:

non

non audeo opponere me decretis virtutis tantæ. Tecum eo,  
ut non procul à loco pugnæ arbitrer eventum rerum, & orem  
DEum, ne tristes minæ effectum habeant. *Ion.* Ora, ut Pa-  
tri parcat, Davidem servet, me auferat sibi.

## C H O R U S.

Ostenditur, quòd *difficilior* sit via ad in-  
fernū, quām, quæ in cœlum ducit.

*Christus* in persona Patrisfamilias. *Servus Mundi.* *Ser-*  
*vus Carnis.* *Servus Diaboli.* *Olitor,* sive *Mundus,*  
curis terrenis occupans suos.

*Christus.* Infelix sum ! ...

Olim, quacunque hora exivi,  
*In otiantes* incidi. Matth. 20.

Nunc, quoties exeo, vacuum forum invenio,  
Et, si quis occurrit, quem volo conducere,!  
Respondet: quare tibi servum] alium:  
Ego *conduc̄tus jam sum!*

Omnes serviunt aliis Dominis, mihi nemo,  
Infelix sum ! ...

Tamen hīc exspectabo,  
Dum fortē sui aliquem servitii rædeat,  
Et ad me transeat....

*Olitor,* \* Eja, serve bone & fidelis ! respira paululum!  
En ! affero prandium !

Refice vires, ut mox redeas alacrior ad labores.

Y y 2

*Serv. M.*

\* Exit cum aquali, & frusto panis, ad servum occupatum in horto  
olerum.

*Serv. M.* Here, bona verba, & tenue prandium

Famelicum post tantos labores

Non satiant stomachum.

*Aria.*

I.

Here,  
Loquendum est sincerè:  
*Jam* fodere non valeo,  
Sub onere deficio :  
Aut tandem bene habe me,  
Aut cogor te deserere:  
Non possum sustinere.

2.

Issem,  
Et alteri serviissem,  
Si qualis tu sis Dominus,  
Intellexissem citius!....  
Lactatus fui vana spe!...  
Si nunquam cognovissem te,  
Feliciar fuisset.

Here,

Loquendum est sincerè.

*Olitor.* Ingrate ! piger ! inutilis serve !...  
Quisquis servit mundo,  
Cur servit, nisi pro pane lucrando ?

*Ariose.*

Vah ! Canis !  
Si Jam non sapit panis,  
Gustanda erunt verbera,  
Trahéis ad supplicia,  
Comede !  
Aut morere !

Quanquam



Quanquam, quid urgeo?  
Nunquid opus est mihi servo seniculo?

Abi stipes! pro uno centum alios habeo.

*Serv. M.* Sic! & sine mercede promissa? ...

Hæc est miseria cum aceto! ...

Sed felix necessitas, quæ cogit sapere!

Eo, & meliorem Dominum peto ...

At ecce! quid video? .... \*

*Serv. C.* Eja! herus abest: fugæ patet ostium!

Num adhuc delibero?... ingenuus sum!

Tædet denique lutulenti laboris!

Ad majora, ad majora sum natus,

Quam ut florem ætatis perdere velim

In servitio foedæ ac fragilis voluptatis.

*Serv. M.* Quid tu conquereris?

*Serv. C.* Ah! quisquis es, Juveni misero

Bonô succurre consiliô.

*Aria.*

Sum Magni Patris filius!...

Et eram adhuc parvulus,

Cum miser casu incidi

In domum hujus figuli:....

Ut vidit me, blandissimis

Aggressus est illecebribus:...

Me vicit curiositas,

Infelix curiositas!...

Ingressus sum, & perii!

Nam didici, ah! didici,

Quæ me jam pudet scire!

Y y 3

2. Ab

\*Fugiens ex officina figuli.

2.

**A**b illo miser tempore  
In foedo versor opere:  
In luto rota figitur!  
In luto circùm agitur!..  
Quis crederet, me nobilem?  
Quis liberum? quis hominem?  
Ah! piget, tædet, pudet me!..  
Poenituit sæpissimè!....  
Ad Patrem sæpè volui,  
(Heu! volui, & nolui!)  
Erubui redire!

*Serv. M.* Miseret me tui! sed in eadem navi sum tecum:  
Ergò quid suadeam,  
Nisi ut turpe jugum excutias mecum?  
Age! mutandus est Dominus!  
Fugimus! fugimus!

*Serv. D.* \* Miserescite boni Superi!  
In qualem tyrannum incidi!

*Serv. M.* Etiam tu fugis tuum Dominum?

*Serv. D.* Latronem fugio, qui hoc momento  
Occidit unum servorum, neque adhuc satiavit sævitium,  
Etiam in mortuum exerit rabiem:  
Dissecat, lacerat, excoriat, devorat!  
Heu! quid feci, cùm ad venatoria  
Me tradidi obsequia,  
Et tot bonas animulas in stygia  
Impuli crudelis retia,  
Tam nullô meô commodô!  
Tam magno cum labore, & gravi periculo!

*Aris.*

*Foras* procurrens sub specie venatoris,

*Malum sumanè triste*

359

*Aria.*

O pessima conditio !

O malè aðta vita,

Væ mihi ! vœ ! vœ misero ,

Si erit finis ita !

*In alieno corio*

Huc usque laboravi :

Jam pelli mee timeo :

Peccavi ! ah ! peccavi !

*Serv. M. Hem!* credidi, me solum esse miserum :

Falsus sum !

*Serv. C. & D.* Eja ! unanimiter alium

Quærimus Dominum !

*Christus.* \* Venite ad me !

*Serv. C.* Vocantem audio ! ..

*Christus.* Venite ad me !

*Serv. D.* Vox est suavissima !

*Christus.* Venite ad me !

*Serv. M.* Dulcedo intima penetrat viscera !

*Christus.* Quid statis ? venite ad me, qui laboratis !

*Serv. M.* Tu vocas nos ? quis es ?

*Serv. C.* Quem jubes laborem !

*Serv. D.* Quam dabis mercedem ?

*Christus.* Ego sum, qui sum,

Solus Dominus, solus Altissimus !

Venite ! mihi servite !

*Aria.*

I.

Nil imperabo grave :

Est jugum meum suave,

Onus levissimum ! ...

\* Ex angulo.

Si

*Si propter me relinquitis,*

*Quod alii*

*Promittunt vobis Domini:*

*Habebitis*

*(Promitto!) centuplum.*

2.

*Audivi suspirantes,*

*Et singulos optantes*

*Mutare Dominum:*

*Mutate! Non est Melior,*

*Quàm ego sum!*

*Aut si occurret Melior,*

*Quàm ego sum:*

*Mutate (non invitus sum!)*

*Mutate iterum!*

*Serv. M. Fratres, juvat experiri, qui sit!...*

*Serv. C. Imus, servimus!*

*Christus. Venite, & quàm sim bonus, videte, gustate!*

*Serv. D. Trahis mirabili suavitate!*

*Christus. \*Hæc est vinea: hanc excolite!*

*Sub vesperum*

*Cuique debitum reddam denarium,*

*Et insuper Coenam magnificam,*

*Qua fatigatos reficiam.*

*Serv. tres. O verè Dominum*

*Ter Optimum, Maximum!*

*O nobile, ô felix servitium!*

*Serv. M. Fratres plaudite! en! adhuc hodie,*

*Christus. Sic est: jam hodie*

Ariose

\*Exhibitio vineæ, & cænæ magnæ in nubibus.



*Christus.*

En Cœna est parata \*  
Qua vos reficiam:  
Nec fames satiata  
Jam premet animam:  
Cessabit servi titulus,  
Amicos appellabo:  
Et ipse, vester Dominus  
Jam vobis ministrabo!  
Venite! servite!

2.

Post horulam laborum,  
Sudorem tergimus!  
*Omnis tres.* Torrenti gaudiorum  
Ærumnas mergimus!  
Momentulum miseriæ  
Quæ isthic toleratur,  
Æternæ pondus gloriæ  
Pro nobis operatur!  
Venimus! servimus!

## P U N C T U M II.

*Saul sibi permisus.*

### S C E N A I.

*Jonathas. Doeg. \*\**

*Jonathas.* D<sup>e</sup>ficio: moreris Jonatha, sic visum est D<sup>E</sup>O! mo-  
rere!... ah! ah! ut cruciat urens plaga! lethale  
vulnus est: nihil ambigo. O montes Gelboe, locus fatalis  
mihi!.. inter has rupes filius Regis moritur, desertus à suis,

\* Exhibitio cænæ magnæ in nubibus \*\* Exhibitentur montes Gelboe.

omni carens humano solatio , bestijs aut carnivoris avibus futurus præda , imò quod ipsa præ morte horreo , persequentibus Philistæis futurus ludibrio ! .. prô ! triste fatum ! .. & in hac ætate, cùm de me conceptæ spes lætos jam fructus ferunt ! nefasta dies ! .. & nemo me juvat ? illinc video hominem . \* Doeg ! Doeg !  
huc ascende ! vulnus obliga , quod perimit Jonatham ! Doeg . parce Princeps ! hostis à tergo imminet : non patitur moram Doegi salus . *Jon.* Saltem trahere me tecum potes ! Doeg . Vix repe-  
rio modum , quo mihi consulam : ita trepidatio mentem turbat .  
*Jon.* At tu dicebas , neminem esse magis intrepidum ad intuitum mortis , quām qui credit , nihil superesse post mortem ?  
Doeg . Nempe discrimen est inter linguam , & cor . *Jon.* Hoc dices tamen , an vivat Pater meus , Rex tuus ? Doeg . Non scio : nec enim tutò expectâsem , dum scirem . Vale Princeps ! *Jon.* Fidelis servus es ! O DEus , impius evadit , & ego morior ! .. Amice David , sic morientem Jonatham si aspiceres , quo animo ferres ? .. occurrit cogitatio bona ! quantum vis ames me , animô magnô tamen hanc sortem ferres , & hortareris , eodem ut ego ferrem placidè acquiescens decretis DEI . Facio : acquiesco ... Propè jam innato meo sanguini : ô sævum vulnus ! ... pro Patre DEUS , pro patre hic fluat crux ! pro patre cadam hostia tibi ! suscipe ! .. placare ! ..

## S C E N A II.

*Saul.* \*\* *Jonathas.* Armiger.

*Arm.* URge Vires Rex ! ne consequantur nos incircumcisî , & vivos capiant . \*\*\* *Jon.* in monte , Cor meum semper rectum ad te non despicies ! *Saul.* Abjicio pretiosa impedimenta fugæ ! juva me ! calco purpuram tot mihi malorum causam ! vale corona tot spinis horrida , quot gemmis micans ! .. *Arm.*

Nunc

\* Fugitus ex prælio præterit . \*\* In valle Fugitus , & vulneratus . \*\*\* procul à Saule solus .



Nunc expeditior fugies. *Saul.* Huc vis, ut ascendam? non possum: gravissimus dolor est. *Arm.* Sed gravius periculum: stitit sanguis, & extra præsens discrimen posito non est nulla salutis spes. Surge! ascende! *Jon.* Durum est mori hac ætate, hoc loco, & sic: solatum tamen, innocentem mori. Recipe Spiritum, Deus Patrum, recipe spiritum, quem dedisti! reddo purum, & immunem à noxâ gravi: sic spero. *Saul.* Actum est, Misael, non ferunt vires laborem viæ: hora imminet destinata neci à sævo Numine. *Arm.* Vah! paululum viæ superest, ut extra discrimen sis ab hoste imminens. *Saul.* Imò hic moriar. *Evagina gladium tuum, & percute me!* (1. Reg. ult.) *Arm.* Hoc absit! nam quò te impatiens furor abripit? *Jon.* Reddo spiritum purum: Sic spero. Tu mihi redde, DEus mi, mercedem grandem nimis promissam Abrahæ! sic cupio. *Saul.* \* Ecce morior! ò amara mors! *Arm.* Nondum moreris: vim facti b! modica via restat. *Jon.* O bona mors, tu me in termino pones, in quo securus sum de summo bono, quod unum bonum est! O pars mea DEus in æternum! *Saul.* Gemitum audio: explora, qui sit. *Jon.* in æternum! *Arm.* Juvate Superi! Jonatham video, Rex, cum morte luctantem: propera, si vivum videre cupis. *Saul.* Cupio: trahe me! \*\* fili mi, Jonatha: ego occidi te! *Jon.* Sic est, Pater mi, DEus filium cum Patre ferit, ut Pater ex cruciatus filii crucietur. *Saul.* Crucior! moriemur simul! *Jon.* Fugiamus simul! *Saul.* Uterque saucii graviter, quò fugiemus, mi fili? *Jon.* In sinum Abrahæ, Pater mi, in sinum Abrahæ, ad Patres nostros, ubi expectabimus Redemptionem Israel. *Saul.* Ita, ita, tu ibis in sinum Abrahæ, ad Patres nostros: sed ego infelix in orcum ibo, ad Cainum, ad Pharaonem, ad Abimelech! *Jon.* Absit, ô Pater! non dividamur! non dividamur! *Saul.* Actum est! projectit me crudelis DEus: dividemur æternū, dividemur! *Jon.* Nunc me occidis! *Arm.* Heu! moreris Princeps! *Saul.* Moreris! *Jon.* DEus, Patri parce! Patris miserere! ...

Zz 2

SCE-

\* Procumbit fatigatus, \*\* Festinat.

## S C E N A III.

Saul. Armiger.

*Arm.* Concidit! heu! funus est! *Saul.* Stupet dolor! Jonatha!.. *Arm.* Frustra moerore conficeris, Rex fugi! hostis persequitur. *Saul.* Cessa! fugere vulnus prohibet, non sinit moeror. Tu evagina gladium tuum, & persecute me! *Arm.* Aliud jube: hoc non facio. *Saul.* Ego facio. *Arm.* Te ipse perimes? non sino. *Saul.* Tu Regi audes tuo manus injicere? recede! *Arm.* Ah! Rex! *Saul.* Angustiae sunt mihi undique! fac animae viam mucro, ut spiritet liberius. Vah! manus debilis non tenet ensim! officium negat! Misael, tu me persecute! *Arm.* Non facio, & non extendo manum meam in Christum Domini. *Saul.* Vecors bestia! quid mihi prodest unctum fuisse in Regem? utinam agaso morerer! persecute me! *Arm.* Imò curram, Rex, ut inveniam hominem, qui me juvet te hinc asportare, ne incidas in manus Philisthjim! *Saul.* Abjit. Jam nemo me impedit, quin finem faciam crudelibus malis... manus ut feriat, non sufficit sibi: at pondus corporis sufficiet, ut incumbens super gladium in mortem concidam. Jonatha, sequor te. Scilicet hoc deerat extremis malis, ut ante me morereris, & in oculis meis! mortuus es! Sequor! sequor! aperi te portas tartara! grandis anima descendit ad vos! ô triste peccatum, huc tu me adigis! valete coeli semper adversi mihi, duri, inhumani, & istis scopulis asperiores! vale terra! ad inferos eo!.. Vah! aberrasti infelix ferrum: nondum vulnus est latum satis. Oh! dolor immanis!... juvate manus! corrigite errorem ensis!.. satis est: sentio: finis venit, Saul, venit finis, nunc finis super te! per omnes jam artus saevit mors! egredere invisa DEO anima! egredere!...

SCE-



## SCENA IV.

Muta.

SUB lugubri musica repræsentantur gravissimæ mortis angustiæ, quas patitur Agonizans Saul ex consideratione temporis præteriti, præsentis, & futuri. Itaque lento passu, & tristi ordine post Præconem, qui feralem pompam præcedit, cum duobus facigeris, animam morientis ad Iudicium citans, ostendunt se miseræ.

I. Peccata commissa, nempe Diffidentia, quam exhibet imago victimæ contra DEI mandatum præpropere immolatæ cum inscriptione: Stultè egisti. (1. Reg. 13.) Inobedientia, quam repræsentant duo Genii prohibitam prædam sub specie Religionis servatam ferentes cum inscriptione: Obedientiam volui, non sacrificium. (1. Reg. 15.) Invidia, & odium, quod exprobrat fugitivus cum Cythara sua Genius Davidis, adscripto lenitate: Quid feci? (1. Reg. 19.) Crudelitas, de qua queritur Achimelech cruentum gladium ostentans, quo cum 84. Sacerdotibus fuerat occisus, cum inscriptione: Quid fecimus? (1. Reg. 22.) Obstinatio, & desperatio, quam arguit umbra Samuelis librum gestans, cum inscriptione: Monui! (1. Reg. 28.)

II. Succedit huic agmini pompa funebris, quam adornant plures Genii ferentes insignia Regia, sed inversa cum inscriptione: Finis est!

III. Demum signum infelicitæ æternitatis, in medio Theatro se instar Cometae constituit cum inscriptione: Initium sine fine! Quod videntes Cives Jerusalæm, (hoc est, animæ bonæ) deflent primi Regis sui miserum interitum, cantantes hæc verba: ô triste peccatum, quod excipit tristis vita, tristior mors, tristissima æternitas! Sauli verò extremæ angustiæ hec identidem suspiria extorquent: nunc recordor, quæ mala fecerim!... recordor!... ô tristis memoria!... vos video David, Achimelech, Samuel!... abscedite tortores sœvi!... Hem! fui Rex! intelligo: finis est! jam quid ero!... atrox cogitatio torquet animum; heu! miser-

Zz 3

æter-

æternū ero ! perji ! DEus deseruit ! mihi relictus sum ! æternū perji ! ... infelix ! .. Egredere invisa Deo anima ! ... egredere !

## SCENA V.

*Abiathar. Armiger.*

**Armiger.** *Hic vides protrita monumenta miseræ Majestatis.*  
*Ab.* Sic vilescunt ? *Arm.* In ista hora. Sed pro-  
 peremus : en h̄ic Jonathas jacet ! *Ab.* Heu ! Jonatha, immanis  
 dolor Davidis tui ! *Arm.* Prō ! quid est hoc ? Rex se occidit !  
*Ab.* Vah ! Rex ! tot sceleribus scelus extremum addis ! ah ! jam  
 torvi oculi in morte natant ! *Arm.* Nullus est motus, nullus est  
 halitus super. *Ab.* O Rex infelix ! *Arm.* Ergò necego vivam.  
*Ab.* Superi ! quid facis Misael ! *Arm.* Morior. *Ab.* Miserere  
 cœlum ! pergit ! Heu ! tria funera lugeo ! omnium causa peccatum  
 est, triste peccatum ! ... præ horrore lapidesco !

# MEDITATIO IV.

## PECCATUM MALUM MAJUS MORTE SIVE OCHOZIAS.

### ARGUMENTUM.

**S**Æpe, quos cupiditas boni nulla potest in peccatum pertrahere,  
*Metus mali præcipitat, quod ope peccati sperant effugi posse,*  
 contra omnes prudentiæ regulas utique, quia remedium  
 eligunt, omnī malō deterius, & ipsa, quæ terribilium  
 omnium terribilissimum dicitur, *Morte majus.* Stultitiae hujus  
 cum tot aliis reum se fecit Ochozias Achabi Filius, Samariæ  
 Rex,